



## **Komunikadu Imprensa**

**12 Agostu 2021**

**Parlamentu Nasionál**

### **JSMP apresia ho esforsu serbisu Komisaun A hodi finaliza lei importante sira iha tempu resesu parlamentár**

Komisaun A Parlamentu Nasionál (PN) iha 28 Jullu to’o Agostu 2021, consege finaliza ona nia aprovasaun iha especialidade ba Projetu Lei Nú.21/V(3.<sup>a</sup>) kona-ba aprova Estatutu Majistradu Judisiál no mós esbosu Lei Organizaasaun Judisiária.

Esbosu lei rua ne’e nu’udar pakote lei ida husi planu reforma setór judisiária nian ne’ebé kompostu husi esbosu hitu mak hanesan Lei Estatutu Magistradu Judisiál, proposta Lei Organizaasaun Judisiária, Estatutu Ministériu Públiku, Estatutu Defensór Públiku, Rejime Jurídiku ba Asosiasaun Públika Profisionál no Kria Orden Advogadu Timor-Leste no Aprova nia Estatutu.

“JSMP apresia as tebes ho esforsu Parlamentu Nasionál, partikularmente serbisu Komisaun A nian hodi tau iha prioridade ba lei hirak ne’e hodi aselera diskusaun no aprovasaun mezmú iha tempu resesu. JSMP konsidera lei sira ne’e nu’udar elementu xave ba hadi’ak liután serbisu sira no funksionamentu instituisaun sira setór judisiáriu nian hodi hakbesik liután justisa ba povu”, dehan diretora JSMP, Ana Paula Marçal.

JSMP mós apresia ho mekanizmu halo lei Komisaun A nian ne’ebé envolve instituisaun sira setór justisa nian tantu iha audénsia públika tantu iha diskusaun iha especialidade Komisaun nian, inklui mós organizaasaun relevante balun sosiedade sivíl nian. Mekanizmu ida hanesan ne’e bele asegura katak lei sira ne’e bele refleta duni interese no aspirasaun ema barak nian no bele responde ho di’ak no adekuaudu nesesidade sira setór justisa nian.

Esbosu lei hirak ne’e mós sai nu’udar advokasia JSMP nian durante tempu naruk ho nia deskobrimentu sira iha serbisu monitorizaasaun ba tribunál sira ne’ebé JSMP apresenta iha nia relatóriu anual sira ba setór justisa hodi bele hadi’ak instituisaun judisiál sira atu asegura qualidade no efetividade serbisu, funksionamentu instituisaun sira setór justisa nian, nune’e mós bele hakbesik liután justisa ba povu.

Entidade sira ne’ebé partisipa iha diskusaun ba esbosu lei rua ne’e mak hanesan Ministériu Justisa, Tribunál, Ministériu Públiku, Defensór Públiku no representante Advogadu Privadu iha Timor-Leste.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Website: <http://jsmp.tl>